

RELACION

PËR

PROJEKTLIGJIN “PËR KORPORATËN E INVESTIMEVE SHQIPTARE”

I. QËLLIMI I PROJEKTAKTIT DHE OBJEKTIVAT QË SYNOHEN TË ARRIHEN

Projektligji “Për Korporatën e Investimeve Shqiptare” (në anglisht, *Albanian Investment Corporation*), është iniciuar nga Ministria e Financave dhe Ekonomisë.

Ky projektligji parashikon krijimin e Korporatës së Investimeve Shqiptare, e cila vjen si një koncept inovator për të adresuar nevojën e zhvillimit të krijimit të kapaciteteve për lehtësimin dhe realizimin e investimeve komplekse dhe me impakt social-ekonomik.

Korporata krijohet si shoqëri tregtare, e organizuar në formën e një shoqërie aksionare, ku ministri përgjegjës për ekonominë është në cilësinë e autoritetit publik, që përfaqëson shtetin si pronar të aksioneve të Korporatës. Institucionet financiare ndërkombëtare të zhvillimit mund të zotërojnë aksione të Korporatës.

Objekti i veprimtarisë së Korporatës është përmirësimi i menaxhimit të pronës publike, krijimi i pronave të reja, vënia në përdorim më eficient të pronave, përgatitja dhe zbatimi i projekteve të investimit dhe mobilizimi i kapitalit shtetëror ose privat, me qëllim kryerjen e investimeve në funksion të zhvillimit ekonomik të vendit. Objektivi kryesor i aktiviteteve të Korporatës konsiston në krijimin e kushteve të favorshme për të rritur investimet në vend, diversifikimin e prodhimtarisë dhe eksporteve, krijimin e ekspertizës për hartimin dhe zbatimin e projekteve komplekse të investimit, si dhe pajisjen e shtetit shqiptar me një kapacitet të munguar për realizimin e investimeve.

Efektet e funksionimit të Korporatës do të ndihen në krijimin dhe forcimin e hallkave ekonomike rreth projekteve të investimit që do të kryejë Korporata, rritjen e punësimit, transformimin e zonave ku do të bëhen investimet e Korporatës, lehtësimin për tërheqjen e investitorëve dhe shtimin e marrëdhënieve ndërmjet sektorit publik e privat.

Fusha e veprimtarisë dhe mjetet që i duhen Korporatës për të kryer funksionet e parashikuara kërkojnë përgatitjen e kuadrit ligjor specifik dhe ky projektligj do të pasohet me disa vendime të Këshillit të Ministrave për të bërë të mundur zbatimin e ligjit dhe rregullimin e plotë të veprimtarisë së Korporatës, në

funkcion të efektivitetit në përmbushjen e funksioneve dhe misionit të saj, pajtueshmërinë me sistemin ligjor dhe bashkëpunimin me institucione të tjera publike ose ndërkombëtare.

II. VLERËSIMI I PROJEKTAKTIT NË RAPORT ME PROGRAMIN POLITIK TË KËSHILLIT TË MINISTRAVE, ME PROGRAMIN ANALITIK TË AKTEVE DHE DOKUMENTE TË TJERA POLITIKE

Ky projektligj nuk është parashikuar në programin e përgjithshëm analitik të projektakteve të Ministrisë së Financave dhe Ekonomisë për vitin 2019.

III. ARGUMENTIMI I PROJEKTAKTIT LIDHUR ME PËRPARËSITË, PROBLEMATIKAT, EFEKTET E PRITSHME

Qeveria shqiptare ka nevojë të shpejtojë procesin e rritjes ekonomike, duke zgjeruar kapacitetin e ekonomisë për të identifikuar, përgatitur dhe ekzekutuar projekte investimi me impakt të gjerë. Këto lloj projektesh kërkojnë shfrytëzimin e aseteve shtetërore, si dhe mobilizimin e kapitalit privat. Shumë nga këto projekte nuk mund të realizohen nga sektori privat pa përfshirjen në një masë të konsiderueshme të shtetit në procesin e dhënies së autorizimit dhe në vënien në dispozicion të aseteve. Kjo ndërhyrje nga sektori publik në fazën përgatitore dhe të parainvestimit është e nevojshme, pasi të dy këto hapa rezultojnë të jenë të kushtueshëm financiarisht po t'i lihen në dorë sektorit privat. Shumë vende, në të gjitha fazat e zhvillimit, krijojnë shoqëri zhvillimi që të konceptualizojnë projekte dhe të sigurojnë kombinimin e duhur të aseteve shtetërore me investimet private për të arritur qëllimin e rritjes ekonomike.

Për të zbatuar me efektivitet këtë qëllim, është e domosdoshme për të pasur një kuadër të fortë institucional dhe qeverisë të procesit. Përvojat e shumta ndërkombëtare kanë treguar se siguri i një kuadri të tillë është faktori kryesor i suksesit dhe shpeshherë është siguruar nëpërmjet krijimit të një institucioni të posaçëm.

Qeveria shqiptare ka nevojë për një institucion që të ndërmarrë role të ndryshme lidhur me zhvillimin ekonomik, role këto që aktualisht nuk ushtrohen nga ndonjë institucion tjetër. Një institucion i tillë kërkon kapacitetin për të transformuar ide dhe nisma investimesh në projekte të financueshme dhe tërheqjen e interesit nga investitorë cilësorë. Shumë projekte kërkojnë që qeveria të përdorë më mirë tokën ose asetet e tjera në pronësi të saj, të përgatisë projekte që, nëse vlerësohen të përshtatshme, mund të financohen. Për të mobilizuar kapitalin, institucioni në fjalë duhet të ketë kapacitetin për të strukturuar transaksione dhe të japë mbështetje financiare kur duhet për të reduktuar riskun tregtar.

Projektligji është hartuar në bashkëpunim e ekspertët e Universitetit të Harvardit, me Qendrën për Zhvillim Ndërkombëtar (CID).

Rolet dhe funksionet e Korporatës

Pas një analize të institucioneve të zhvillimit të sektorit publik dhe potencialit të investimeve në vend, propozojmë krijimin e një korporate investimi, Korporata e Investimeve Shqiptare (*Albanian Investment Corporation*). Kjo strukturë nuk ekziston aktualisht në ekosistemin e agjencive në vend dhe as në sektorin privat. Është një njësi me thelbin e një fondi investimesh, por me qëllim të përcaktuar për zhvillimin ekonomik të vendit.

Njësia që propozohet është e konceptuar për të qenë në gjendje të përfaqësojë qeverinë shqiptare në menaxhimin e aseteve strategjike dhe në maksimizimin e mobilizimit të kapitalit privat. Ajo është e konceptuar të marrë përsipër shfaqjen e riskut në projektet strategjike dhe gjithashtu të bashkëpunojë me institucione financiare ndërkombëtare (IFIs) dhe sektorin privat.

Disa nga funksionet kryesore konsistojnë në:

- analizën e projekteve (transformimi i “ideve” në “projekte të financueshme”);
- strukturimin financiar të projekteve;
- vënia në përdorim më eficient e pronave shtetërore;
- mobilizimin e kapitalit privat (marrja e rreziqeve të përllogaritura).

IV. VLERËSIMI I LIGJSHMËRISË, KUSHTETUTSHMËRISË DHE HARMONIZIMI ME LEGJISLACIONIN NË FUQI VENDAS E NDËRKOMBËTAR

Projektligji është në harmoni me Kushtetutën dhe ligjin nr.9901, datë 14.4.2008, “Për tregtarët dhe shoqëritë tregtare”, të ndryshuar.

V. VLERËSIMI I SHKALLËS SË PËRAFRIMIT ME ACQUIS COMMUNAUTAIRE (PËR PROJEKTAKET NORMATIVE)

Ky projektligj nuk synon përafrimin me ndonjë *acquis* të Bashkimit Evropian.

VI. PËRMBLEDHJE SHPJEGUESE E PËRMBAJTJES SË PROJEKTAKTIT

Projektligji është i ndarë në 6 krerë dhe 26 nene.

Në nenin 1 është përcaktuar se projektligji ka si qëllim krijimin e Korporatës së Investimeve Shqiptare dhe rregullon organizimin, funksionimin dhe veprimtarinë e saj.

Në nenin 2 të projektligjit përcaktohen objektivat e Korporatës, si më poshtë vijon:

- a) Nxitja e zhvillimit ekonomik dhe social nëpërmjet projekteve të investimit në nivel qendror, vendor e rajonal, në mbështetje të politikave shtetërore të zhvillimit;
- b) Vënien në përdorim më eficient të pronave shtetërore;
- c) Kryerja e investimeve duke mobilizuar kapital shtetëror dhe/ose privat;

Në nenin 3 përcaktohen parimet e përgjithshme me anën e të cilave udhëhiqet Korporata, si më poshtë vijon:

- a) përparësia e zhvillimit ekonomik dhe social në nivel qendror, vendor dhe rajonal, si dhe lidhja me politikat shtetërore të zhvillimit;
- b) pavarësia në vendimmarrje, në kryerjen e funksioneve dhe në propozimin e projekteve;
- c) trajtimi në mënyrë të drejtë dhe të barabartë i palëve me të cilat bashkëpunon;
- ç) zbatimi me efektivitet, efikasitet dhe ekonomicitet i funksioneve dhe detyrave;
- d) nevojshmëria dhe proporcionaliteti në marrjen e masave për realizimin e objektivave;
- dh) respektimi i parimit të konkurrencës së lirë dhe efektive, në procedura dhe treg;
- e) zbatimi i procedurave transparente, të thjeshta dhe të kontrollueshme;
- ë) integriteti dhe ndalimi i konfliktit të interesave në kryerjen e funksioneve dhe marrëdhëniet me partnerët e palët e treta;
- f) përgjegjësia ndaj palëve të interesuara dhe partnerëve;
- g) përgjegjësia për zhvillimin e politikave sociale.

Përveç parimeve të përcaktuara më sipër, Korporata udhëhiqet edhe nga parime e kritere të tjera, të përcaktuara statut dhe në aktet e tjera të saj, si dhe në marrëveshjet respektive me institucionet dhe/ose palët e treta.

Në nenin 4 është përcaktuar statusi i Korporatës, e cila krijohet si shoqëri tregtare, në përputhje me legjislacionin për tregtarët dhe shoqëritë tregtare, e organizuar në formën e një shoqërie aksionare. Ministri përgjegjës për ekonominë përcaktohet si autoriteti publik, që përfaqëson shtetin si pronar të aksioneve të Korporatës. Institucionet financiare ndërkombëtare të zhvillimit mund të zotërojnë aksione të Korporatës. Procedura, kriteret dhe formula e

pjesëmarrjes së institucioneve financiare ndërkombëtare të zhvillimit përcaktohet me vendim të Këshillit të Ministrave.

Në nenin 5 përcaktohen burimet financiare të Korporatës. Fillimisht, me krijimin e saj, Korporata do të financohet nga buxheti i shtetit, i cili do të shërbejë si kapital fillestar i Korporatës. Gjithashtu, Korporata mund të financohet edhe nga:

- a) kontributi i buxhetit të shtetit me vendim të Këshillit të Ministrave, kontributi i institucioneve publike dhe/ose i institucioneve financiare ndërkombëtare;
- b) transferimi i pronave publike për zhvillimin dhe realizimin e projekteve të Korporatës;
- c) fondet dhe/ose kontributet materiale të investitorëve për zhvillimin dhe realizimin e projekteve;
- ç) donacionet ose dhuratat;
- d) të ardhurat e përfituara nga aktivitet e saj dhe shërbimet e ofruara;
- dh) burime të tjera, të lejuara nga legjislacioni në fuqi dhe aktet e saj të brendshme.

Në këtë nen përcaktohet se Korporata gëzon të drejtën e marrjes së kredive nga institucione financiare dhe sanksionohet se detyrimet financiare të Korporatës nuk i transferohen buxhetit të shtetit, pra, përgjegjësia për shlyerjen e detyrimeve financiare është detyrim i Korporatës.

Në nenet 6 e 7 përcaktohen objekti i veprimtarisë dhe funksionet e Korporatës, të cilat janë, sipas rastit, hartimi, analizimi, koordinimi, menaxhimi, përfaqësimi, financimi, zbatimi dhe mbikëqyrja e projekteve të investimit. Gjithashtu, kjo dispozitë përcakton dhe funksionet kryesore të Korporatës, të cilat janë:

- a) Zhvillimi dhe menaxhimi i pronave shtetërore;
- b) Hartimi i projekteve të investimit në pronat shtetërore dhe, sipas rastit, marrja përsipër e zbatimit të tyre;
- c) Analizimi dhe shqyrtimi i projekteve të investimit të paraqitura nga institucione vendase ose të huaja, publike ose private;
- ç) Financimi apo bashkëfinancimi i projekteve të investimeve në prona shtetërore dhe/ose private;
- d) Hyrja në marrëdhënie bashkëpunimi me institucione financiare vendase dhe/ose ndërkombëtare për të siguruar investime;
- dh) Vepron si pronar i pronave të fituara nga Korporata ose pronave shtetërore të transferuara tek ajo;
- e) Vepron si palë kontraktuese me palë të treta.

Në nenin 8 përcaktohen mënyrat e transferimit të pronave shtetërore të Korporata.

Në këtë nen është përcaktuar se, kur Korporata identifikon prona shtetërore me interes për të realizuar projekte investimi, i propozon Këshillit të Ministrave, nëpërmjet ministrit përgjegjës për ekonominë, transferimin e tyre të Korporata.

Me vendim të Këshillit të Ministrave, Korporatës mund t'i kalojë:

- a) e drejta e pronësisë së pronave shtetërore;
- b) e drejta e përdorimit të pronave shtetërore.

Kriteret dhe procedurat për dhënien e pronës, e cila ka kaluar të Korporata me qira, enfiteozë, *leasing*, përdorimit, transferimit, shitjes, përdorimit si kolateral ose të përdorimit në forma të tjera, përcaktohen me vendim të Këshillit të Ministrave.

Në nenin 9 janë përcaktuar rastet e dhënies së autorizimeve.

Është përcaktuar se, me propozimin e ministrit përgjegjës për ekonominë, Këshilli i Ministrave, me vendim, mund të autorizojë Korporatën:

- a) të kontraktojë, të ndërmjetësojë ose të zbatojë projekte zhvillimi;
- b) të funksionojë si autoritet kontraktues bashkëpjesëmarrës në projektet e investimeve strategjike, sipas legjislacionit për investimet strategjike;
- c) të marrë rolin e zhvilluesit/operuesit në zonat teknologjike dhe zhvillimit ekonomik, sipas legjislacionit në fuqi;
- ç) të gëzojë statusin e investitorit strategjik të veçantë, sipas legjislacionit në fuqi.
- d) të ushtrojë funksione të tjera, të deleguara nga Këshilli i Ministrave;

Në nenin 10 janë përcaktuar format e pjesëmarrjes së Korporatës në investime, si më poshtë vijon:

- a) Korporata vepron si investues i vetëm në projekt investimi;
- b) Korporata vepron si bashkëzhvilluese e investimit;
- c) Korporata vepron si bashkëzhvilluese e një zone territoriale të caktuar, në të cilën realizohen investime;
- ç) Korporata vepron si bashkëpjesëmarrëse në investim, në forma të tjera.

Gjithashtu, është përcaktuar se procedurat dhe format e pjesëmarrjes së Korporatës në investime përcaktohen me vendim të Këshillit të Ministrave.

Në nenet 11, 12 e 13 përcaktohen masat mbështetëse të shtetit në mbështetje të Korporatës me infrastrukturë ndihmëse, si dhe marrja e licencave dhe parashikimi i procedurave të posaçme të prokurimit dhe/ose konkurrimit.

Kështu, për zhvillimin dhe zbatimin e një projekti investimi, Korporata mund të mbështetet nga shteti me infrastrukturë ndihmëse, të tilla si: rrugë, ujësjellës, kanalizime, energji elektrike dhe telekomunikacion.

Ministria përgjegjëse për ekonominë, në bashkëpunim me ministritë e tjera, shqyrton dhe verifikon nevojat e kërkesat për infrastrukturë ndihmëse, si dhe vlerëson koston e përafërt për realizimin e saj, kosto kjo e cila nuk duhet të jetë disproporcionalisht e lartë, në raport me vlerën dhe rëndësinë e projektit të investimit.

Mbështetja me infrastrukturë ndihmëse miratohet me vendim të Këshillit të Ministrave, me propozimin e ministrit përgjegjës për ekonominë.

Është përcaktuar se, kur autorizohet nga Këshilli i Ministrave për realizimin e një projekti, Korporata përgatit dokumentacionin e nevojshëm për finalizimin dhe ekzekutimin e projektit. Korporata dorëzon për miratim në organet kompetente dokumentacionin e nevojshëm që kërkohet nga legjislacioni sektorial për miratimin e licencave/lejeve/autorizimeve së bashku me mandatpagesat e tarifave respektive dhe se organet kompetente, nëse konstatojnë që dokumentacioni është i paplotësuar, i kërkojnë Korporatës plotësimin e të gjithë dokumentacionit dhe të dhënat e kërkuara, duke listuar kërkesat në mënyrë specifike.

Institucionet/entet/autoritetet publike, me marrjen e dokumentacionit nga Korporata, brenda 15 ditëve pune, kthejnë përgjigje për kërkesën për miratim të licencave/lejeve/autorizimeve, sipas legjislacionit në fuqi. Përgjigjet, nga sa parashikohet më lart, për shkaqe të arsyeshme që lidhen me kompleksitetin e licencave/lejeve/autorizimeve, afati shtyhet vetëm një herë, për një periudhë kohore prej 30 ditësh pune.

Nëse organet kompetente nuk njoftojnë vendimin e arsyetuar lidhur me kërkesën për marrjen e licencave/lejeve/autorizimeve brenda periudhës prej 30 ditësh pune, ato konsiderohen të miratuara në heshtje, në ato raste kur parashikohet nga legjislacioni i fushës në fuqi.

Gjithashtu është përcaktuar se Korporata u nënshtrohet procedurave të posaçme të prokurimit dhe/ose konkurrimit. Procedurat dhe rregullat e prokurimit të veçantë, sipas kësaj pike, përcaktohen me vendim të Këshillit të Ministrave, në përputhje me praktikat më të mira të institucioneve financiare ndërkombëtare të zhvillimit.

Në nenin 14 përcaktohen organet drejtuese të Korporatës, të cilat janë:

- a) Asambleja e Përgjithshme;
- b) Këshilli mbikëqyrës;
- c) Drejtori ekzekutiv
- ç) Bordi këshillimor.

Neni 15 përcakton se Asambleja e Përgjithshme është organi më i lartë vendimmarrës i Korporatës, si dhe çështjet për të cilat vendimmarrja është prerogativë e Asamblesë së Përgjithshme. Asambleja merr vendime për çështjet, si më poshtë vijon:

- a) Miratimin e statutit të Korporatës;
- b) Miratimin e strategjisë;
- c) Miratimin e projekteve të investimit, kur kërkohet transferimi i pronave shtetërore;
- ç) Miratimin e pasqyrave financiare vjetore dhe të raporteve të ecurisë së veprimtarisë së Korporatës;
- d) Çështje të tjera të parashikuara shprehimisht nga ky ligj, ligji për tregtarët dhe shoqëritë tregtare, si dhe statuti i Korporatës.

Neni 16 flet për përbërjen e Këshillit mbikëqyrës. Këshilli përbëhet nga pesë anëtarë nga të cilët: një anëtar është përfaqësues i institucioneve qendrore dhe katër përfaqësues nga biznesi dhe fusha akademike. Procedurat e emërimit dhe lirimit të tyre, si dhe kriteret e përzgjedhjes do të përcaktohen në statutin e Korporatës.

Kompetencat e Këshillit mbikëqyrës përcaktohen në nenin 17 të projektligjit.

Këshilli mbikëqyrës siguron që Korporata gëzon autonomi operationale në veprimtarinë e saj dhe ka këto kompetenca:

- a) Propozon për miratim pranë Asamblesë statutin e Korporatës dhe ndryshimet në të;
- b) Propozon për miratim pranë Asamblesë strategjinë e Korporatës;
- c) Miraton planin e biznesit dhe planet vjetore të punës;
- ç) Miraton dhe më pas propozon pranë Asamblesë projektet e investimit kur kërkohet transferimi i pronave shtetërore;
- d) Miraton ngritjen e strukturave të tjera të Korporatës;
- dh) Kontrollon dhe mbikëqyr zbatimin e politikave dhe projekteve të investimit të Korporatës;
- e) Miraton treguesit e performancës dhe monitoron performancën e saj;
- ë) Kujdeset që Korporata të respektojë ligjin dhe standardet e kontabilitetit;

- f) Siguron që pasqyrat financiare vjetore, raportet e ecurisë së veprimtarisë, si dhe detyrimet e tjera të raportimit e publikimit, të detyrueshme në bazë të ligjit apo statutit, kryhen me saktësi nga Korporata;
- g) Siguron që auditimi i librave dhe i regjistrimeve kontabël kryhet të paktën një herë në vit nga një komitet i specializuar i pavarur;
- gj) Zhvillon, zbaton, monitoron dhe komunikon kontrollet e brendshme, programet për përputhshmërinë ligjore, etike, si dhe masa të tjera, përfshirë edhe ato që kontribuojnë në parandalimin e mashtrimit dhe të korrupsionit;
- h) Emëron dhe liron drejtorin ekzekutiv;
- i) Përcakton pagat dhe shpërblimin e organeve dhe administratës së Korporatës;
- j) Krijon komitete të posaçme lidhur me kontrollet e brendshme, përputhshmërinë ligjore dhe etike në Korporatë;
- k) Miraton kriteret dhe procedurën e zgjedhjes së anëtarëve të bordit këshillimor.

Këshilli mbikëqyrës bashkëpunon me bordin këshillimor për marrjen e vendimeve.

Këshilli mbikëqyrës miraton ngritjen e komiteteve të specializuara për përmbushjen e detyrave të tij.

Këshilli mbikëqyrës miraton procedurat dhe kriteret për shqyrtimin e miratimin e projekteve.

Këshilli mbikëqyrës përmbush edhe detyra të tjera të parashikuara nga ky ligj, ligji për tregtarët dhe shoqëritë tregtare, si dhe statuti i Korporatës.

Në nenin 18 përcaktohet se drejtori ekzekutiv është përfaqësuesi ligjor i Korporatës dhe përgjigjet përpara Këshillit mbikëqyrës. Kjo dispozitë autorizon Këshillin mbikëqyrës për emërimin dhe shkarkimin e drejtorit ekzekutiv sipas kushteve, afateve dhe rregullave, të cilat do të përcaktohen në aktet e brendshme të Korporatës dhe në kontratën me drejtorin ekzekutiv.

Në nenin 19 përcaktohen kompetencat e drejtorit ekzekutiv, i cili gjatë ushtrimit të funksionit të tij, ka për detyrë:

- a) të administrojë veprimtarinë e Korporatës;
- b) të përfaqësojë Korporatën në marrëdhënie me të tretët;
- c) të kujdeset për mbajtjen saktë e të rregullt të dokumenteve e të librave kontabël të Korporatës;
- ç) të përgatisë e të nënshkruajë bilancin vjetor, bilancin e konsoliduar dhe raportin e ecurisë së veprimtarisë, së bashku me propozimet për

investimin e fitimeve;

- d) të krijojë një sistem monitorimi e njoftimi të hershëm për rrethanat që kërcënojnë menaxhimin, performancën dhe ekzistencën e Korporatës;
- dh) të kryejë regjistrimet e publikimet e detyrueshme të të dhënave të Korporatës, sipas legjislacionit në fuqi;
- e) të raportojë përpara Këshillit mbikëqyrës dhe bordit këshillimor për zbatimin e politikave dhe të projekteve të investimit të Korporatës;
- ë) të sigurojë zbatimin e vendimeve të Asamblesë, Këshillit mbikëqyrës, legjislacionit dhe të akteve të brendshme të Korporatës.

Drejtori ekzekutiv bashkëpunon me bordin këshillimor për të propozuar projekte investimi për miratim në Këshillin mbikëqyrës.

Drejtori ekzekutiv përmbush edhe detyra të tjera të parashikuara nga ky ligj, detyra të tjera që kryen administratori, sipas përcaktimeve të ligjit për tregtarët dhe shoqëritë tregtare, si dhe statuti i Korporatës.

Neni 20 përcakton përbërjen dhe kompetencat e bordit këshillimor, i cili përbëhet nga 9 (nëntë) anëtarë që zgjidhen nga Këshilli mbikëqyrës. Një anëtar zgjidhet nga radhët e institucioneve qendrore, dy anëtarë përfaqësojnë institucionet ndërkombëtare financiare të zhvillimit dhe gjashtë anëtarë të tjerë janë të pavarur, nga të cilët tre janë përfaqësues të biznesit dhe tre nga fusha akademike. Anëtarët e bordit këshillimor janë shtetas shqiptarë ose të huaj.

Bordi këshillimor ka funksion këshillues për Këshillin mbikëqyrës dhe drejtorin ekzekutiv për nismat, projektet e propozuara për Korporatën dhe aktivitetet e tjera të saj. Bordi informon rregullisht Këshillin mbikëqyrës dhe drejtorin ekzekutiv mbi zhvillimin dhe zbatimin e planit të punës së Korporatës dhe mund të ngrejë komitete të specializuara për të kryer detyrat e tij, përfshirë edhe një komitet për të këshilluar për shpërblimin e anëtarëve të Këshillit mbikëqyrës.

Në nenin 21 përcaktohet se struktura dhe organika e Korporatës miratohen nga Këshilli mbikëqyrës dhe se marrëdhëniet e punës së personelit të Korporatës do të rregullohen sipas dispozitave të Kodit të Punës të Republikës së Shqipërisë dhe akteve të brendshme të Korporatës.

Në nenet 22 e 23 përcaktohet se Korporata duhet të mbajë kontabilitetin e veprimtarisë së saj ekonomike, në përputhje me ligjin nr.25/2018, “Për kontabilitetin dhe pasqyrat financiare”, si dhe të përgatisë raportin e veprimtarisë, inventarët dhe llogaritë vjetore, në përputhje me legjislacionin kontabël në fuqi. Gjithashtu, përgatit auditimin e pasqyrave financiare të Korporatës, sipas legjislacionit në fuqi për auditimin ligjor, organizimin e profesionit të ekspertit kontabël të regjistruar dhe të kontabilistit të miratuar.

Nenet 24, 25 e 26 janë dispozita kalimtare dhe hyrja në fuqi e ligjit.

VII. INSTITUCIONET DHE ORGANET QË NGARKOHEN PËR ZBATIMIN E PROJEKTAKTIT

Për zbatimin e këtij projektligji ngarkohet Ministria e Financave dhe Ekonomisë dhe Korporata e Investimeve Shqiptare.

VIII. RAPORTI I VLERËSIMIT TË TË ARDHURAVE DHE SHPENZIMEVE BUXHETORE

Ky projektligj krijon efekte financiare, pasi krijon strukturë të re shtetërore.

Për vitin 2019, nga buxheti i shtetit është parashikuar një fond buxhetor prej 368 milionë lekësh, në buxhetin e Ministrisë së Financave dhe Ekonomisë, si kapital fillestar për Korporatën.

KËSHILLI I MINISTRAVE